


柳田文庫
文庫11
D 268
5



文庫 11
D 268
5

柳田泉史序

元經薛氏傳卷七

經安帝隆安元年春正月卽位加元服魏道武帝皇
始元年二月呂光將禿髮烏孤自稱大單于甲寅尊
李氏爲皇太后戊午立王氏爲皇后三月光將段業
自稱涼州牧夏四月王恭夷楷殺王國寶王緒秋八
月慕容麟殺慕容祥無傳冬十月

傳曰安帝諱德宗孝武長子也卽位之歲當魏道
武帝之皇始元年也然則一歲而書二帝何也文
中子曰元經抗帝而尊中國其天命之所歸乎皇

010190558725

始之帝也徵天命以授魏也晉宋之主近於正體
於是未忘中國晉本中國之舊也未嘗有樹晉之功圖中國之志或問皇

始授魏而帝晉何也子曰主中國者將非中國也

假立以歲時不欲遽棄齊梁陳之君則斥之四夷以明中國

有代矣元經至魏禿髮烏孤鮮卑人其先

與後魏同出西晉時樹機能侵有涼州之地武帝

遣馬隆破之其後惡復鞬受呂光假節河西都統

烏孤嗣位至是稱大單于西平王李太后諱陵容

尊為崇訓太后王皇后諱神愛父獻之母新安主

太元二十一年納為太子妃至是立為皇后禮也

段業為建康太守有沮渠男成者說業曰呂氏政

衰權臣擅命府君以蓋世之才豈可附垂亡之主

男成今唱大義欲屈府君撫臨鄙州乃推業為涼

州牧甲戌王恭兗州刺史庾楷豫州刺史共舉兵

以討僕射王國寶王緒為名朝廷乃殺國寶及緒

以解兵書曰王恭庾楷殺王國寶王緒言政在諸

侯矣初國寶為會稽王道子妃由是與道子游處

又因尼妙音與太子母陳淑媛游帝悅其諂媚與

從弟王緒皆見知於道子倚以心腹爲時所嫉俄掌朝政於是王恭檄庾楷舉兵討之道子力不能拒諸侯乃收國寶賜死并斬緒以謝恭楷政由諸侯而天子弱矣且明道子執政之罪也

經隆安二年春帝正月三日龍舟災夏五月蘭汗殺慕容寶秋七月慕容盛誅蘭汗王恭庾楷殷仲堪桓玄楊佺期舉兵反八月桓玄敗王師于白石九月詔會稽王道子率將軍謝琰王珣討桓玄冬十二月魏道武帝改元天興都平城襄陽流人叛牡炆反京口

傳曰龍舟災沴大也桓玄篡之象也天戒若曰王者流遷龍舟失水故災之耳慕容寶旣敗於魏師南奔蘭汗蘭汗者垂之舅盛之妻父也必謂無貳至龍城爲汗所殺慕容盛聞寶死盛馳赴哀汗妻乙氏亦哀盛遺其子蘭穆迎盛舍之親敬如舊盛夜因如廁袒而踰垣入于東宮與舊昵人李早等漸汗及其二子王恭者蘊子也欲謀誅國寶與殷仲堪桓玄相結乃抗表京師曰後將軍王國寶猥以姻戚驟登顯列先帝登遐夜乃犯閤欲矯遺詔

五經 卷之七 三
賴皇太后聰明逆謀不果與其從弟緒同黨凶狡
昔趙鞅與甲除君側之惡臣雖駑劣敢忘斯義表
至戒嚴道子割庾楷四郡隸江州楷怒使人謂恭
曰貶削方鎮宜早圖之恭乃告殷仲堪桓玄衆推
恭爲盟主故書曰反以恭爲首桓玄者溫孽子也
聞王恭有憂國之言而桓玄潛意於功業乃說荆
州刺史殷仲堪曰國寶并緒互相表裏若用殷覬
爲荊州則君何以處仲堪曰計將安出玄曰說王
恭與晉陽之師我當率荆楚之衆此桓玄之舉也

俄移都督交廣玄不行乃與庾楷討江州刺史王
愉及譙王尚之兄弟率南蠻校尉楊佺期攻江州
王師擊之爲玄所敗詔道子加黃鉞遣其子元顯
等討之玄等走潯陽魏道武帝改元大興者平慕
容寶始有燕趙之地於鄴置行臺建號爲魏也古魏
地襄陽流人常禮叛降姚興也杜焞新安太守反
于京口詔會稽王世子元顯討平之

經隆安三年春正月二月林邑陷日南九真遂寇交
趾交趾太守杜瑗討破之段業自稱涼王仇池公稱

藩三月陳夫人爲皇后夏六月慕容德陷青州殺辟閭渾秋八月禿髮烏孤死弟利鹿孤立冬十月秦姚興陷洛陽十一月妖賊孫恩陷會稽十二月桓玄襲江陵殺殷仲堪楊佺期梁呂纂殺呂紹自立

傳曰林邑國漢象林縣馬援鑄銅柱之地也其先范逸子文文攻大岐界小岐界式僕徐 屈都乾魯扶單等七國并有其衆四五萬人永和中文攻陷日南害太守夏侯覽殺數千人餘奔九真以覽尸祭天鏟平其城遣使告交州求日南之北橫山

爲界林邑少田故貪日南之地四年文又襲九真

害人十八九文死其子佛立寧康中佛常入貢至

是復來寇日南九真於是交州虛弱而林邑亦弊

矣

按徼外諸國嘗以寶物自海南入貢以資貨賄而交州刺史及日南太守多貪利侵侮由是憤

怒反爲其攻破

杜瑗討破之

告功也段業前年自稱牧

至是僭王仇池公稱藩以言楊氏稟晉命也陳夫人諱婦女松滋潯陽人也初入宮爲淑媛生安恭二帝至是尊爲皇太后禮也慕容德稱南燕趨廣固寇青州殺我龍驤將軍辟閭渾自此北鄙無主

而人懷于魏矣

按慕容德先據青州諸郡曰逆賊辟門渾父蔚昔用段業阻亂淄川

我大宰東征勦絕凶命渾於覆巢之下蒙全卵之

施盜據秦遣附吳越稷下之雄岱北之士有斬

者常同佐命渾出 難未靜宜立長君故眾立其弟利鹿孤徙居西平

遣使梁明 涼段業問曰有子何以不立明對曰

有子羗奴然先王所命也業曰昔成王幼周召作

宰漢昭八歲而金霍夾輔不亦可乎明日宋宣能

以國讓春秋美之孫伯符委事仲謀終開有吳之

業兄終弟及殷湯之制也何必胤已為是紹兄為

非業曰美哉若使乎姚興攻洛陽執我太守辛恭

靖自是二京之舊皆陷後秦矣孫恩者孫秀之族

子也父秦事錢塘杜子恭學妖術誑百姓愚者敬

之後有罪伏誅恩逃于海聚黨百餘人因元顯暴

政百姓騷動恩襲會稽殺內史王疑之有眾數萬

於是會稽吳郡吳興義興臨海永嘉東陽新安凡

八郡賊皆應恩起兵害太守民死者十七八焉仲

堪者驃騎殷師之子也能清言善屬文與韓康伯

齊名累遷至荆益都督隨桓玄所誘而反聞恭楷

已死乃奔還玄大失援以仲堪與楊佺期交質追至江州及之其後仲堪佺期共擊玄玄爲所敗佺期走襄陽仲堪走鄴城皆爲玄所殺書曰桓玄襲江陵言桓氏強非仲堪能擊之也梁呂纂字永緒先符堅時入大學以此交結公侯堅敗纂奔至姑臧及光死子紹秘不發喪纂入哭之甚哀紹懼讓位於纂纂不許旣而呂志言於紹宜早圖之紹不從曰兄弟至親也豈有此乎每念袁尚兄弟未嘗不痛心也臨機不斷大事去矣呂弘不樂紹立乃告纂廢昌邑之義請兄爲中宗纂於是率壯士夜踰禁城守衛以劍斫纂中額壯士執守衛者纂曰勿殺義士也纂外結紹登閣自殺呂超出奔廣武纂僭卽天王位謚紹爲隱王書曰呂纂殺紹不言兄弟言兄不兄弟不弟故兩書若凡人相殺之文也

經隆安四年春帝正月二月星孛奎婁夏四月孫恩寇浹口五月東亭侯王珣卒己卯孫恩寇臨海謝琰自死六月庚辰司馬劉裕討孫恩于南山秋七月太

皇太后李氏崩

無傳

丁卯秦姚興納乞伏乾歸降丁卯

僕射王雅卒元顯殺車胤冬十一月元顯封其子彥

璋爲東海王十二月河右李嵩稱涼公

傳曰巳卯星孛于奎長三丈上至紫微入北斗奎

至三台三月遂經于太微帝坐端門占曰彗掃天

于庭閣道易主象也孫恩寇浹口據會稽自號征

東將軍聞劉牢之來討曰我不失作勾踐也于珣

字元琳導孫也初爲桓溫椽與謝玄齊名溫稱珣

曰謝椽四十必擁旄仗鉞王椽當作黑頭三公累

遷左僕射封東亭侯與殷仲堪徐邈王恭郗恢並

以文辭見名于帝珣嘗夢人遺以大筆如椽俄而

帝崩哀無謚議皆珣草以疾解職歲餘卒書侯重

世封也王導謝琰字瑗度安之次子也破符堅有

功封望蔡公又平王恭遷衛將軍孫恩作亂詔琰

與劉牢之俱進討旣而不爲武備恩自海島潛窺

伺忽寇浹口入餘姚逼山陰琰遣叅軍劉宣之拒

恩咸以謂宜持重分兵設伏以待之琰不聽賊掩

至塘路窄琰軍魚貫而進賊在艦中旁射之至千

秋亭琰敗績爲帳下都督張猛斫琰馬墜地被害
謚曰忠肅書曰自死讓不能兵又不恤其帳下宜
乎自敗死焉孫恩浮海向京口劉裕緣海拒之及
戰大敗之恩狼狽赴船走姚興患勃勃乾歸亂於
西北僣檀遜擅於河右各謀將帥鎮撫二方於是
乞伏乾歸先遣使送所掠守宰謝罪請降許之歸
其于熾磐官爵經不書伐言興實患勃勃而權納
乾歸也元顯者會稽王道子子也驕侈聚斂專總
百揆故封其子彥璋爲東海王書曰元顯封其子

言政不由帝也涼武昭王季嵩字玄盛初事段業
業聽讒於索嗣而疑嵩於是晉昌太守唐瑤檄六
郡推嵩爲涼公建年曰庚子屯玉門陽關廣田積
粟爲東伐之資矣王雅字茂達魏衛將軍肅之曾
孫也性接下敬慎任過其才時人以佞幸目之道
子爲太子太傅而雅爲少傅時王珣有時望其男
婚而賓客車馬甚盛俄聞雅拜少傅輒廻詣雅雅
應接傾心禮之孝武將擢王恭殷仲堪等雅曰殷
仲堪雖謹於細行幹畧不長四海無事必能守職

若道不常隆必爲亂階矣帝不聽有識稱其知人
末年慎默而已無復辯正遷僕射卒君子謂茂達
潛知季世非已能救故隱以保全詩曰旣明且哲
以保其身茂達之謂矣車胤字武子辟爲桓溫從
事與吳隱之齊名皆以寒素聞於世善於賞會當
時皆云坐無車公不樂謝安遊集輒開筵待之孝
武帝嘗講孝經陸納侍講下耽謝石袁宏執經胤
與王混搃句時論榮之太元中增置太學生胤
博士進爵臨湘侯以疾去職後爲吳興太守不赴
選吏部尚書元顯有過胤密言於道子將奏之事
泄元顯逼令自殺胤乃卒書曰元顯殺車胤譏無
君也

經隆安五年正月二月呂超殺呂纂立其兄呂隆夏
五月沮渠蒙遜殺段業六月孫恩至丹徒秋七月段
興殺慕容盛九月呂隆降姚興

傳曰呂纂荒耽酒色又嘗責怒呂超超頓首稱不
敢纂乃引超讌內殿呂隆屢勸纂酒昏醉超以劔
刺纂洞胷斬纂首以狗曰纂殺害太子昵近小人

九經 卷七 十
番禾太守超以骨肉之親懼社稷顛隕今已除之
矣乃立隆沮渠蒙遜臨松胡人也博涉書史頗曉
天文滑稽善權變呂光殺其二父蒙遜於是起兵
據金山依段業業封之爲臨池侯蒙遜嘗謂兄男
成曰業信讒愛佞無鑒斷之明今除業以奉公何
如男成不許蒙遜告男成叛業收男成殺之蒙遜
泣告衆人曰男成忠於段公枉見害諸君能爲報
仇乎衆皆泣從之羌胡起兵響應逐殺業業京兆
人儒素長者無權畧故爲姦佞所誤而死孫恩至

丹徒乙亥內外戒嚴命高素張崇之守石頭劉襲
柵斷淮口司馬恢之戍南岸桓謙司馬允之屯濠
備白石王嘏孔安國屯中堂譙王尚之衛京城震
恐設備也慕容盛寶之子也在位馭下驕暴多所
猜忌其臣段興因衆心搖動夜鼓譟大呼盛聞變
率左右出戰俄一賊從闇中擊傷盛召叔父熙屬
以後事而死熙立乃誅段璣等夷三族呂隆字永
基光弟寶之子也超旣殺纂讓位於隆隆有難色
超曰今猶乘龍上天豈可中下隆在位多殺豪望

以立威名內外囂然魏安人焦朗者說姚碩德曰
呂氏因秦之亂制命此州諸子競尋 民死者

大半明公救生靈之沉溺布徽政於王門碩德從
之率衆至姑臧呂超出戰敗還超謂隆曰應龍以
屈伸爲靈大人以知機爲美天命去矣宗族可全
隆乃降碩德碩德表隆爲涼州刺史

經元興元年春正月庚午大赦改元詔將軍元顯劉
牢之司馬尚之討桓玄三月劉牢之叛降桓玄辛未
桓玄敗王師于新亭殺元顯及其六子壬辰遷道子

于安城醜殺之南涼禿髮利鹿孤死弟儻檀嗣立孫

恩死盧循爲主秋七月乙亥奴殺新蔡王崇無傳冬十

月冀州劉軌叛歸慕容德

傳曰大赦改元政出元顯也道子爲長夜之飲政
無大小一委元顯故妄行政令赦出無名焉桓玄
兵至京師匱乏惟給桴椽而食劉牢之以元顯信
任張法順故叛歸桓玄玄至新亭元顯棄船屯國
子學堂列陣于宣陽門玄出太桁牢之率衆逐元
顯執之送于新亭縛於舫前而數之元顯荅曰爲

張法順所誤遂殺之玄奏道子酣縱不孝當棄市
 詔遷之於安城郡尋亦鴆殺禿髮鹿孤死遺令以
 弟儻檀嗣儻檀少機警鹿孤在位軍國事皆委儻
 檀及立自號涼王遷居樂都歸欵于姚興冀州慕
 容德舊牧之地也德既僭號于滑臺而東接齊魯
 於是劉耽背晉歸德懼有辟閭之誅也孫恩敗投
 水死妖黨猶曰為水仙衆推盧循復為寇

經元興二年春二月劉裕破徐道覆于東陽夏四月
 癸巳朔日有蝕之秋八月桓玄自號相國楚王冬十

一月壬午移太廟神主于琅邪十二月玄篡位帝蒙
 塵于潯陽

傳曰徐道覆者盧循黨也癸巳日蝕帝將蒙塵之
 兆也桓玄加九錫自稱楚王起荊州為國號也冬
 十一月壬午遷帝于永安宮癸未移晉神主于琅
 邪降諸侯舊封也桓玄於姑熟僭帝位大赦改元
 建始與趙工倫同號又號永始執權年同其符僭逆如此於是
 劉裕等斬桓修於京口斬桓弘於廣陵玄震駭出
 南門南奔逼乘輿西上帝蒙塵于潯陽玄所逼也

經元興三年春正月帝在潯陽三月庚申劉裕置留
臺具百官夏四月劉裕討桓玄武陵王遵稱制攝萬
幾五月壬午督護馮遷斬桓玄乘輿反正奉神主人
太廟問片桓振陷江陵帝蒙塵于賊營六月毛璩討
桓希斬之秋七月戊申永安皇后何氏崩冬十月盧
循寇廣州南燕慕容德死兄子超立

傳曰帝在潯陽桓玄軍中也劉裕置行臺司徒王
謚推裕錄尚書事四月丙戌詔以幽逼於玄萬機
虛曠乃立武陵王遵遵元帝孫也字茂遠初封年

十二授拜流涕感動左右桓伊嘗詣遵遵曰吾門
何謂通桓氏左右曰桓溫疎宗相見無嫌遵曰我
聞人姓木邊便欲殺之况諸桓乎由是以聰慧稱
桓玄降遵爲彭澤侯遣之國行次石頭夜濤水入
淮舩破不得出會義旗興復詔攝萬機內外敬之
五月桓玄義軍戰于崢嶸洲玄敗走將投梁州桓
希益州都督馮遷抽刀而前玄曰何人敢殺天子
遷曰殺天子之賊耳遂斬玄首送京師梟于大桁
乘輿反正復奉神主歸太廟禮也桓根復據江陵

以拒義師擁帝居賊營六月毛璩自領梁州遣將
攻漢中殺桓希桓氏始衰也皇后何氏諱法倪父
準后無子稱穆皇后居永安宮與安帝蒙塵至巴
陵劉裕奉后遠都至是崩盧循譙曾孫也娶孫恩
妹恩亡衆推循爲主泛海至番禺寇廣州逐刺史
吳隱之自攝州事遣使貢獻朝廷多虞權假循廣
州刺史慕容德迎其兄之子超于長安德夢其父
曰汝旣無子何不立超寤而告其妻吾將死矣乃
下書以超爲太子

經義熙元年春帝正月帝在江陵南陽守魯宗之破
桓謙桓振于祚溪劉道規擊桓謙走之乘輿反正戊
戌詔大赦改元二月譙縱殺刺史毛璩以蜀叛三月
將軍劉懷肅斬桓振帝至自江陵四月劉裕還京口
秋八月冬十二月乞伏乾歸破仇池楊盛

傳曰魯宗之起義襲破襄陽進軍擊桓振與桓謙
北走帝得反正乃改元義熙以義兵致重熙也譙
縱巴西人也始爲安西府叅軍蜀人愛之刺史遣
縱東下縱有貳志因民不樂東行道次涪城毛璩

聞之自涪城步還成都率兵討縱塚戰死焉劉懷
 肅自雲杜伐桓振廣武將軍唐興斬振奉帝至京
 師書曰至自江陵告于廟也劉裕還京口言自還
 也非詔命能制矣乞伏乾歸既附姚興姚興加乾
 歸為左賢王率眾攻仇池楊盛于西陽堡大破之
 經義熙二年春帝正月刺史司馬榮期擊譙子明于
 白帝夏五月封法蓮為高陽王秋七月冬十月封劉
 裕豫章公劉毅南平公何無忌安戎公

傳曰譙子明者譙縱將也司馬榮期為益州刺史

擊子明于白帝以破賊來告也南陽王法蓮高密
 王之子也十月論匡復功劉裕為首劉毅何無忌
 次之其餘封賞有差不書畧也

經義熙三年春正月二月車騎將軍劉裕來朝劉裕
 殺殷仲文及其弟叔文道叔并駱球夏五月大水

無傳

六月赫連勃勃僭位于朔方八月劉敬宣監征蜀冬
 十一月赫連勃勃敗禿髮傉檀慕容雲殺慕容熙自
 立

傳曰劉裕來朝者用劉穆之之謀自丹徒領揚州

入輔政且疑殷仲文等異已也殷仲文雖娶桓玄
 妹而素不交密作玄九錫辭納貨賄家累千金玄
 敗乞解職待罪詔不許遷為東陽太守意不平劉
 毅深相禮接之不過何無忌無忌疑其簿已中傷
 之言於劉裕曰桓胤殷仲文腹心之疾

初赦文云除桓胤外

餘桓氏不赦

至是以仲文與駱球謀反及其弟竝諫之

書裕殺者以其聽何無忌中傷之也然仲文畜賄
 貪祿不為無過不稱官懲懲之也赫連勃勃字屈
 丐劉淵族也長八尺五寸腰十圍美風儀性辯慧

高平沒奕于以女妻之事姚興使鎮朔方時有河
 西鮮卑獻馬八千與姚興勃勃襲殺沒奕于并其
 家僭稱天王國號夏以謂夏禹苗裔也劉敬宣者
 牢之之子也牢之平孫恩威名甚振初與主恭同
 起兵背恭自降詔討桓玄輒降玄尋又背玄歸晉
 有劉襲者謂牢之曰事不可者莫大於反而將軍
 往年反王兗州也恭近日反司馬郎君也安帝會復反
 桓公也玄一人三反豈可得乎敬宣先還京口失期
 不到牢之疑為劉襲所殺矣乃自縊俄敬宣至與

高雅之同奔慕容超玄敗復還京至是使乎盧循
 遷征虜將軍監征蜀勃勃偕號求婚于僞檀僞檀
 弗許勃勃怒伐之殺萬餘人掠羊馬數十萬去僞
 檀追之其將焦朗諫曰不如從溫圍北渡趨萬斛
 堆阻水結營制其咽喉百勝之術也其一將賀連
 曰彼牛羊塞路財貨若山不能抗我宜在速追僞
 檀追之勃勃聞而喜乃於陽武下峽鑿凌埋車以
 塞路逆擊大敗僞檀慕容熙者垂少子也為妻符
 后起承華殿土與穀同價典軍杜靜載棺上書諫

熙怒斬之符后死熙如喪考妣使有司案檢臨哭
 者有淚以為忠孝無淚則罪之羣臣莫不含辛為
 淚將軍馮跋觀熙政暴虐推慕容雲為主發上方
 徒五千閉門拒熙熙葬符氏收髮貫甲身馳赴難
 攻北門不克走微服隱于林中索而殺之雲葬於
 符氏之墓國人皆笑之

傳夷禮所以
言召禍也

經義熙四年春帝正月琅邪王德文領司徒劉裕錄
 尚書事夏四月僕射孔安國卒秋七月冬十一月大
 風拔樹十二月陳留王曹靈誕薨

元經 卷七 十一
傳曰德文卽恭帝也劉裕意先尊德文而後已圖
進位也孔安國僕射愉之子也安國儒素清正嘗
爲東海王師詔曰卿導達津梁依仁游藝亦至左
僕射卒大風拔木盧循兵至之兆也曹靈誕魏陳
留王奐之後也書薨重國賓也

經義熙五年春帝正月二月慕容超寇宿豫執劉千
載趙元二太守而去三月將軍劉裕伐慕容超夏六
月丙辰震于太廟秋七月九月盜殺高雲馮跋篡位
冬十月魏紹殺其君道武帝

傳曰慕容超字祖明長八尺精彩秀發德甚愛之
名之曰超立爲太子及嗣位遣斛穀提公孫歸等
率騎寇宿豫執南陽太守趙元陽平太守劉千載
濟陰太守徐阮而去震于太廟者何春秋僖十五
年震夷伯之廟罪人也於是展氏有隱慝焉今震
太廟天戒若曰廟社不靈人主昏弱權臣震蕩隱
慝之咎發於此乎高雲卽慕容雲也本姓高氏自
以謂無功德而豪傑所推常畏懼畜養壯士以爲
腹心有離班桃仁者專典禁衛賞賜月至數千不

測殺雲而衆推馮跋爲主跋字文起信都人也慕容寶召署爲將軍至是僭稱天王魏道武帝拓跋氏諱珪獻明皇帝之子也其子清河王紹作亂弑崩長子嗣誅元凶紹而立稱明元皇帝

經義熙六年春帝正月三月將軍劉裕克慕容超齊地悉平賊循來寇將軍何無忌拒循於豫章死之夏五月戊子將軍劉毅及循戰于桑洛洲王師敗績僕射孟昺自殺秋七月盧循去寇荊州復走潯陽八月秦將桓謙寇江陵冬十一月蜀將譙縱陷巴東

傳曰慕容超任公孫五樓故人爲之語曰欲得侯事五樓至是劉裕伐超慕容鎮言曰昔成安君不守井陘之關終屈於韓信諸葛瞻不據東馬之險卒擒於鄧艾臣謂阻守大峴上策也超不從俄而公孫五樓段暉皆敗而超守廣固乞救于秦會秦爲赫連所破救兵不至超歎曰吾寧奮劍決死不
能衝壁求生裕用降人張綱以衝車版屋及飛樓應梯臨其城超支解綱母城破執超神色自若一無所語送建康市斬之何無忌東海剡人其舅劉

牢之無忌始事東海王彥璋密與劉裕圖桓玄玄甚懼言曰劉裕勇冠三軍當今無敵劉毅家無擔石之儲樗蒲一擲百萬何無忌酷似其舅舉大事何慮不成及破桓玄遷都督八郡事盧循別帥徐道覆順流大艦重樓無忌率衆拒之長史鄧潛之諫曰舟艦居上流蜂蠆有毒宜決南塘守二城以待之賊必不敢捨我遠下俟其疲老擊之無忌不從戰敗無忌厲聲曰取我蘇武節來躬親督戰握節死之劉毅爲衛將軍朝廷以盧循自江陵與徐道覆合勢來寇江寧詔毅拒戰于桑落洲爲循所敗孟昶聞賊至京師大懼乃自殺循攻石頭柵不利船艦爲暴風所傾乃進攻京口掠無所得迴據潯陽將取荊州劉裕統大衆繼進戰大敗之循單舸收散卒走桓謙以玄旣亡乃奔蜀進諫署爲荊州刺史率衆而下至枝江刺史劉道規擊而斬之譙縱遣其弟子明爲鎮東將軍攻巴州剋之遂屯于白帝自稱成都王十二月

經義熙七年春帝正月二月將軍劉藩斬徐道覆于

始興夏四月交趾刺史杜惠度斬盧循於水中秋七月冬十月涼李暠敗沮渠蒙遜

傳曰劉裕先遣孫處從海道據番禺盧循歸不能入徐道覆保始興至是皆爲刺史所斬傳首京師賊悉平也涼李暠初西時留女名敬愛養於外祖尹文文旣東遷從姑梁褒母養之其後禿髮儁檀假道北山遣褒送敬愛于酒泉與暠通好暠率騎二萬畧地至建東沮渠蒙遜聞之來侵建康暠大怒率兵追及戰于彌安大敗之

經義熙八年春帝正月二月甲寅山陰地陷夏五月乞伏公府殺乞伏乾歸秋八月皇后王氏崩庚辰劉裕矯詔殺劉毅及劉藩謝混大赦天下冬十二月將軍朱齡石伐蜀

傳曰山陰地陷方四丈有聲如雷占曰地陷裂者臣下分離坤道喪也乞伏乾歸於義熙三年僭稱秦王至是畧于五谿有梟集其手乾歸惡之俄爲兄子公府所殺及其諸子十餘人公府奔火夏乾歸長子熾磐舉兵討之公府走智遠等追擒于曠

岷山并其四子輟之熾磐自立王皇后諱神愛獻
之女也無子崩年二十九葬休平陵號安禧皇后
劉毅字希樂沛人也討桓玄功最多嘗謂何無忌
不平毅能引咎不校時論躱之又討盧循有功累
加都督荆楊交廣請劉藩爲副劉裕覺其貳於已
乃奏帝曰劉毅傲狠凶戾履霜日久長惡不悛志
在姦妄從弟藩遠相影響招聚剽殺左僕射謝混
憑藉世資輕佻躁脫扇動內外連謀百里是而可
忍孰不可懷乃收劉藩謝混誅之裕自率衆討毅

命王鎮惡等至豫章燔舟而進攻陷外城毅與戰
至日暮焚諸門力攻之毅自北門軍騎走去江陵
而縊先書殺毅者言劉裕志在除毅而逮及藩混
也且貶裕專殺故不書官朱齡石伐蜀縱出奔尚
書令馬耽者封府庫以待王師縱自縊而死

經義熙九年春帝正月三月劉裕殺諸葛長民夏四
月弛湖池之禁秋九月封劉義員桂陽公冬十二月
高句麗倭國來貢

傳曰諸葛長民琅邪人有文武幹才不持行檢始

爲桓玄參軍有罪免及劉裕建義長民預謀以討
玄功拜輔國將軍又平盧循都督六郡監太尉留
府事貪侈殘虐百姓苦之劉毅誅死且曰昔年醢
彭越前年殺韓信禍其至乎貧賤常思富貴富貴
必履危機今欲爲丹徒布衣豈可得也裕聞而疑
之伏壯士幙中引長民與語壯士自後拉而殺之
收其弟黎民黎民驍勇與捕者苦戰而死小弟幼
民逃于山中進擒戮之傳曰裕酷及其弟也四月罷臨沂湖
熟皇后脂澤田詔賜貧民因而弛湖池之禁古之

道也昔文王靈臺靈沼與民共之漢詔以苑囿給
賜貧民晉祚下衰劉裕擅此所以取民心也雖然
但能法古利民民之主也劉義真者何裕次子也
無功而封公將自愛其家也高麗扶餘種也倭國
大海山島百餘小國相接魏時有三十國戶十萬
黥面文身自言太伯之後其道當會稽東重譯入
貢

經義熙十年春帝正月三月戊寅地震夏六月乞伏
熾磐滅禿髮儁檀秋九月丁巳朔日有蝕之冬十月

城東府

傳曰戊寅地震劉裕之權盛矣乞伏熾磐與沮渠
 蒙遜合勢攻僞檀僞檀敗而歎曰蒙遜熾磐委質
 於吾而我歸之不亦痛哉四海之廣匹夫無所容
 身與其聚而同斃不若分而獲全以兄之子樊尼
 使之西遂降熾磐熾磐遣使郊迎諸城從而皆下
 惟浩豐尉賢政不下熾磐呼之曰樂都已潰卿獨
 守何為賢政對曰受涼王恩厚為國藩屏雖知樂
 都已潰妻子被擒然不知主上存亡未敢歸命昔

羅憲待命晉文亮之文聘後來魏武不責委付之
 重竊用恥焉大王將安用哉熾磐遣僞檀于手書
 諭之賢政諭武臺曰汝為國儲不能盡節棄父背
 君虧萬世之業我義士也豈若汝乎既而僞檀至
 乃降書滅者傷滅其國也丁巳日蝕革命之徵也
 城東府者何尚書府也自道子元顯分東府西府
 掌其事至劉裕因之居東府今城之防不虞也

裕錄尚書事而城
 其府以防他變也

經義熙十一年春帝正月荊州司馬休之雍州魯宗

之舉兵討劉裕二月秦姚興死子泓立三月辛巳劉裕及司馬休之戰于江津王師敗績

休之義兵故書王師夏四

月司馬休之魯宗之出奔姚興劉義真封彭城公宋齡石豐城公巴西霍山崩秋八月丁未僕射謝裕卒

無傳冬十月

傳曰司馬休之字季預譙敬王恬第三子也討王恭庾楷有功後為桓玄所敗奔慕容超及玄敗復歸京師遷平西將軍都督荆雍六州子文思作亂休之上疏請解荊州歸罪闕庭不許遂與魯宗之

共誅執政者時休之次子文寶兄子文祖在都下皆為裕先賜死自率兵征之遺休之治中韓延之書曰文思事遠近所知送與司馬君使自訓厲至公之極也而了無愧心久絕表疏天地所不容吾受命西征止其父子而已彼土僞舊一無所問吾虛懷期物自有由來韓延之報曰聞親率戎馬遠履西畿士庶惶駭莫知師出之名也辱疏始知譙王前事良增歎息平西迺體國忠貞欵懷待物以公有匡復之功家國蒙賴譙王往以微事見劾猶

自表遜位况以大過當默然便及于戎自義旗以
 來方伯誰不先吞疇而徑表天子可謂欲加之罪
 其無辭乎劉裕欲誑國士天地不容在彼不在此
 矣劉藩死於閭闔之門諸葛斃於左右之手甘言
 詭方伯襲之以輕兵遂使席上靡欵懷之士聞
 外無自信諸侯良可恥也吾以平西之至德寧可
 無授命之臣乎當與臧洪遊於地下耳裕得書而
 歎曰事人當如此魯宗之自襄陽會休之共屯江
 陵拒裕戰于江津大敗俱奔姚興興死裕平姚泓

又奔魏義隆裕之子與朱齡石論乎蜀之功故皆

封公巴酉霍山奔出銅鐘六枚記異也

古祠神名山多以鐘

磬藏其地故陵遷而出

經義熙十二年春帝正月姚泓遣魯軌寇襄陽夏赫
 連勃勃取秦州秋八月琅邪王德文伐秦姚泓冬十
 月秦將姚洸以洛陽降已丑高密王恢之修五陵
 傳曰魯軌者宗之子也宗之既奔秦遣其子軌欲
 取襄陽為晉將趙倫所擊敗走夏赫連勃勃攻秦
 上邽克之殺秦州刺史姚平又攻陰密姚恢棄安

定奔長安書曰取秦州言易也

經書取秦州傳言克上邽按地理志

秦武公伐邽戎有上邽有下邽上邽隸秦州下邽隸臨晉至勃勃秦州刺史鎮上邽城八月

劉裕同琅邪王德文伐姚泓經書德文不稱裕者

先宗王而抑權臣也裕心欲挾帝弟之勢遠伐中

原本防他變爾經特不書裕嫌征伐自諸侯出抑

其太盛也十月裕將檀道濟至洛陽姚洗懼出降

高密王恢之敬王恬之子也姚洗既以洛陽降詔

恢之修宣景文武惠帝陵禮也

經義熙十三年春帝正月甲戌日有蝕之無傳二月涼

李嵩死子歆立三月將軍王鎮惡破姚紹于潼關夏

四月劉裕敗魏師于河曲秋七月劉裕克長安滅姚

泓冬十二月僕射劉穆之卒

傳曰李嵩寢疾顧命宋繇曰吾喪亂之際遂為此

方所推不能一同河石今氣力憊然不復起矣死

者人理吾不悲之所恨志不申耳吾終之後世子

歆猶卿子也無使專驕自任薨年六十七謚曰武

昭王歆字士業府寮奉為涼公姚泓遣胡翼度據

潼關遣姚鸞步騎五萬拒晉師於潼關裕使王鎮

惡自秋社西渡渭逼姚難引師而西是時大霖雨
 渭水漲不得北渡鎮惡水陸俱進追及姚難姚難
 陣涇上拒鎮惡鎮惡敗之遁還長安姚紹紹總其事
 聞晉師過關嘔血而死書曰破姚紹紹總師也魏
 遣將娥青救姚泓至河曲為劉裕所敗斬其裨將
 阿薄子七月劉裕進攻長安泓將妻子詣壘門而
 降宗室百餘人亦降裕盡殺之送泓建康市斬之
姚長以孝武太元九年立至
 泓三世而滅共三十二年
 經義熙十四年春正月辛巳大赦沈田子殺王鎮惡

於長安劉裕封宋公秋七月冬十一月赫連勃勃敗
 王師於青泥復陷長安十二月戊寅劉裕弒帝崩
 傳曰夏赫連勃勃聞劉裕破姚泓謂群臣曰裕克
 長安利在速返必留子弟守關中待裕發軫吾取
 之易於拾芥耳於是據安定盡有嶺北之地裕遣
 勃勃書請連和勃勃命皇甫徽為文陰誦之乃召
 裕使口授令人為書荅裕裕覽文奇之既而留子
 義真守長安而還勃勃之臣王買德進計曰劉裕
 以亂攻亂未有德政濟蒼生使弱才小兒守之非

經遠之計也狼狽而返者欲速成篡耳無暇有意於中原陛下以順伐逆義貫幽冥青泥上洛南師之衝要宜斷其去來之路然後杜潼關塞峭險絕水陸之道義真獨坐空城逃竄無所可謂兵不血刃而自定矣勃勃從之使買德南斷青泥勃勃率大軍繼至義真使沈田子逆戰不利田子與王鎮惡出城遂殺之義真又討沈田子於是閉門自守赫連夜襲長安裕聞之大懼召義真鎮洛陽使朱齡石守長安義真東歸百姓逐齡石而迎勃勃入

長安勃勃謂王買德曰卿往日之言可謂筭無遺策也復陷長安貶裕之罪也言速篡位無意於中原也戊寅帝崩於東堂年三十七帝不慧自少及長口不能言雖寒暑無所辨凡動作皆非已出故桓玄之篡因此獲全初有讖云昌明之後有二帝故裕密使王韶縊帝而立恭帝以應二帝然後禪代也故經書劉裕弑帝崩春秋之制凡弑君稱君君無道也稱臣臣之罪也又例曰凡自虐其君曰弑也君子謂劉裕殺姚泓之已降及宗室從而遇

齊篡宋汝陰見殺劉無少長盡幽死易
所謂積不善有餘殃其劉裕之謂乎

經晉恭帝元熙元年春正月帝卽位立皇后褚氏甲
午劉裕還朝夏四月秋七月劉裕移鎮壽陽冬十月
乙酉劉裕以義真鎮揚州十一月丁亥朔日有蝕之
十二月黑龍四元東方

傳曰恭帝諱德文安帝母弟也初封琅邪王義熙
十四年十一月劉裕矯安帝遺詔曰大司馬琅邪
王體白先皇明德光懋屬推儲貳衆望攸集其君

臨晉邦奉系宗祀允執厥中燮和天下闡揚來誥
無廢我高祖之景命遂卽位劉裕自伐秦回是月
始朝焉移鎮壽陽以其子義真鎮揚州張外勢以
窺內也丁巳日蝕晉祚盡此焉黑龍四見者何傳
曰皇之不極是謂不建厥咎眚厥罰常陰厥咎弱
時則有龍蛇之孽有下人伐上黑陰色也見東方
劉氏出東海之應也

經元熙二年春正月夏六月劉裕至京師諷帝禪位
於宋

元紀 卷七 三十一
傳曰六月劉裕至京師傳亮承裕旨諷帝禪位草
詔而請帝書之帝謂左右曰晉氏久失之矣今復
何恨乃書赤紙爲詔甲子帝遜於琅邪舊第裕以
帝爲零陵王居秣陵行晉正朔車旗服色一如舊
法然有其文而不備其禮焉明年裕使兵人踰垣
弑帝於內房謚曰恭帝年三十六經不書弑謂前
年已弑安帝今逼以禪則弑之義欲蓋而彰焉

